

INUIT ATAQATIGIIT

INATSISARTUNI



UPA 2016/49
11. maj 2016
Ane Hansen

Sumiginnaanerit pillugit nalunaaruteqartarnissanut kommunini ataatsimoorussamik oqarasuaammik aalajangersimasumik sianerfigineqarsinnaasumik pilersitsinissaq pillugu kommuninut isumaqatigiinniaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Sianerfigisinnaasatigut nuna tamakkerlugu kalerriutigineqartut tigooqqarneqartassapput, kommuninullu pineqartunut erngertumik ingerlateqqittarnissaat qulakkeerneqassalluni. Ulloq unnuarlu sianerfisinnaasap ilusilernissaanut Naalakkersuisut kommunit peqatigalugit aalajangiisinnaatitaassapput. Siunertarineqartoq, tassaasoq innuttaasut tamarmik pisariunngitsumik pisortanut sianersinnaalernissaat sumiginnaanermillu kalerriisinnaalernissaat taamalilluni anguneqassaaq.
(Inatsisartunut ilaasortaq. Naaja H. Nathanielsen, Attaviitsoq)

Meerartatta sumiginarneqartarnerat arlaannattaluunnit akuerisinnaanngilaa, meerartagut isumassorneqarluarlutik toqqissisimallutillu peroriartornissaat tamatta pisussaaffigaarput.

Ukiuni kingullerni nunatsinni innuttaasut atukkamikku naligiikkunnaariartortillugit ajoraluartumik meeqqanik sumiginnaasarnerit ersarilliarput, angajoqqaat artorsateqarnertik pissutigalugu imigassamik, ikiaroorartumik, persuttaanermik, ajornerpaatullu meeranguanik kinguaassititigut atornerluisarnermik nalaataqartartut naammattoorneqartartut takornartaajunnariartorlutik.

Sinerissamilu sumiiffinni tamani inunnik isumaginninnermik suliaqartut ilinniarsimasut amigaataanerisa ilaanni nassatarisarpaat kommunini meeqqat sumiginarneqarnerannik suliassangortinneqartartut angummaffigineqarsinnaajunnartuuisarnerat. Pissutsit taamatut inissinneranni uangut inatsisartuni Naalakkersuisoqarfinnilu qanoq ikiussinnaanerput kommunit akornatsinni oqaloqatigiissutiguarparput.

Kommunerujussuungortitsineri siunertanut ilaavoq inunnik isumaginninnermi suliaqartut qitiusumiit kommuninut nutsertinnissaat innuttaasut qanimut sullinneqarnissaat nukittorsarumallugu. Siunertalli kissaatigisatut ajoraluartumik ingerlasimangillat, tamatumali killormuuanik maannakut inissisimalernikuuvugut, inunnik isumaginninnermi ilinniagaqarsimasut ilinniarluarsimasullu Namminersorlutik Oqartussat ataani sulisutut katersuukkiartornerat annertusisimavoq qitiusumik politikikkut suliniutigineqartartut annertusiartornerat ilutigalugu pissutsit taamatut ineriartulersimammata.

Maanna aamma siunniunneqartunut ilaavoq kommunit meeqqanik isumaginninnermi sumiginnaasutut nalilerneqarpata sulianik arsarneqarsinnaalernissaat, taamatut siunniussaarneq kommunit inunnik isumaginnittussaanerannik arsaarinninnerusaaq, meeqqanik arsaarinninnermut assersuunneqarsinnaasoq.

Pissutsit taamatut ineriartornerat ajuusarnartorujussuuvuq imami pisoqartariaqaraluarpoq uagut kommunit inunnik isumaginninnermut pitsaasumik suliaqarnissaannik sinaakkutissanik isumassuissasugut kommunit inuit qanillugit sullissinerisat nukittorsarnissaallu siunertaralugu.

Siunnersuuteqartup Naaja H. Nathanielsen-ip siunnersuutaa soqutigintartut isigarput kommuninik isumaqatiginninniarnissamik siunertaqarmat aammalu ataatsimoorluni meeqqat sumiginarneqartarnerisa annikillissarnissaannut aqutissat ilaattut taasariaqarmat. Inuit

Ataqatigiinni inassutigerusupparput Naalackersuissut kommunimut siunnersuutip siunertaa naammassiniarlugu suleqatigiissutiginiissaa siunertarlugu saaffiginnissuteqassasut.

Ajornartorsiut alla iliuseqarfigeqqusarput tassaavoq maluginiarsimagatsigu Ilaqutariit inigisaminniit anisitaasartut meerartallit aamma amerliartormata, ajornartorsiut taanna meeqqanik isumaginninneq eqqarsaatigalugu imaannaanngilluinnarpoq iliuseqarfigineqartariaqartoq. Ukiuni makkunani ilaqutariit inigisaminniit anisitaasartut amerliartornerat ilutigalugu meeqqat aamma annertuumik artorsaateqalersartut takussaalernikuupput, ajornartorsiut taanna ilanngullugu kommunimut qanimut oqaloqatigiissutigalugu iliuseqarfigineqartariaqartutut Inuit Ataqatigiinnit isigarput.

Taamatut oqaaseqarluta sinnersuutigineqartoq tungaviatigut tapersersorsigu nalunaarutigissavarput siunnersuutillu aappassaaneerseqartinnani Inatsisartut ilaqutariinnermut ataatsimiisitaliani suliarineqassasoq inassutigalugu.